

EN PAULUJ A KIJIN LIKAU ON MEN ROM.

¹ PAULUJ ladun Iejuj Krijtuj men, me paeker, en wiala wanporon amen, me katoror *on* papa ronamau en Kot, ² Me a kotin kopekidor japwilim a jaukop akan nan kijin likau jarau kan. ³ Duen japwilim a Ol me kijan kadaudok en Dawid ni tiak en pali uduk, ⁴ O me kadede kidar, me a Japwilim en Kot a manaman, duen a kotin iajadar *jan* ren me melar akan ki *Nen* jarau, Iejuj Krijtuj atail Kaun, ⁵ Me kit ale *janer* mak o koa en wanporon, pwen padaki *on* men liki kan karoj ni mar a, pwe irail en pojon o peik, ⁶ Pwe komail pil kijan irail, me paeker *don* Iejuj Krijtuj. ⁷ Komail karoj kompoke pan Kot, me paeker me jarau kan, me mimi Rom mak o popol *jan* ren Kot Jam atail o Kaun Iejuj Krijtuj en mi re omail! ⁸ Iet kaieu, i kin *kapina* ai Kot ki Iejuj Krijtuj pweki komail karoj; pwe omail pojon me kalok jili lel *penan* jap karoj. ⁹ Pwe Kot, me i kin papa *on* ni *nen* i ni ai padapadaki wei ronamau en japwilim a Ol, me jaunkadede pai, me i kin tamataman kin komail anjau karoj, *nidinid* ni ai kapakap akan. ¹⁰ *Nidinideki* anjau karoj, ma i jota pan kak pwarala re omail, ma iduen kupur en Kot. ¹¹ Pwe i *inon ion* udial komail, pwe i en *katunole* kin komail ekij *pwaij nenin*, pwe komail en *tinainda*. ¹² Pwe i en *kajarloleid* re omail, pweki atail pojon ta ieu. ¹³ Ari, ri ai ol akan, i jota men, me komail en jaja duen ai *kileledier* pan pak toto, en pwar *won* komail, ap jaik pijoki *on*, pwen

diar ekij wan ai dodok re omail, dueta ren wei tei kan. ¹⁴ Pwe nai me pwaipwand *on* men Krik o men liki kan, o *on* me lolekon o me jo lolekon kan. ¹⁵ Pwe duen a pan kak pai, i men pil padaki *on* komail men Rom ronamau. ¹⁶ Pwe i jota kin namenok ki ronamau, pwe i manaman en Kot, me kin kamaurela me pojon akan karoj, Juj oko maj, ap pil men Krik. ¹⁷ Pwe i me kin kajanjaleda *pun* en Kot, me kin pwili *jan* pojon, pwen pojon duen a intinidier: Me *pun* o pan memaureki pojon; ¹⁸ Pwe *onion* en Kot pan janjaleda *jan* nanlan *on* me doo *jan* Kot akan o me japun en aramaj akan, me kin kawela melel ni arail japun. ¹⁹ Pwe duen me pwarada *jan* ren Kot me janjal *on* irail, pwe Kot me kotin kajanjale *on* irail, ²⁰ Pwe meakan me jo janjal duen i, iet akan, a manaman joutuk o pil duen a udan Kot *jan* ni anjaun jappa wiauiet, kin janjal kida japwilim a dodok kan, pwe jolar pekid parail: ²¹ Pweki irail ajadar Kot, a re jota wauneki i duen me kon *on* Kot pil jota majak tol a, a re aklemai *on* i, *monion* japun arail ap rotorotalar. ²² Irail akereki pein irail ap lamponlar. ²³ Irail kawukilar linan en Kot me jo kak mor pajan, *on* mom en aramaj me kin mor pajan o mom en manpir akai, o man aluki pa, o man korop akan. ²⁴ I me Kot kotin mueide kila irail, en *inon ion* kajaminlar *monion* arail ni ar kajautela pein war arail nan *pun* arail, ²⁵ Me kawukila melel en Kot *on* likam, ap poni o papa *on* dipijou mon Jaun wia meakaroj, me iajanai potepoteta amen. ²⁶ Nan i me Kot mueidela kin ir *on inon* jued akan, en lel *on* arail li akan, en wuki *jan* ira 'rail, kaokaoe ira 'rail.

27 Pil dueta ol akan liki *jan* iran li, ap kalel nan pun arail; ol ajada ol, me jo kon, ap pein kapokala nan war arail manidi en ar wiawia kan. 28 Nan duen irail *kan* kataman *on* Kot, Kot ap mueidalan irail, en kapitakaila kamom *on* wia meakan me jued, 29 Me dir en japun karoj, morjued, norok kapwa, jempok, dir en peirin, lolap, akamai, widin, weid, lidu monin, 30 Pil en pan moli, likinekine, kajenta Kot, *kan* kapunlol, aklapalap, ponmajo, me kin diar me jued akan, jo oke jam ar o in ar, 31 Lampon, inaujopoujok, jempok, jomak. 32 Re aja duen kapun pun en Kot, me kin wia mepukat, pan mau *on* mela, a kaidin i eta, pwe re pil kin perenki irail, me kin wia mepukat.

2

1 NAN i jota pakid pa om, aramaj amen koe, amen amen me kin kadeikada, pwe ni om kadeikada amen, pein koe me koe kin kariaala, pwe koe, me kin kadeikada, kin wiawia me dueta. 2 A kitail ajaer, me kadeik en Kot me meler *on* ir, me kin wiada mepukat. 3 A dadue aramaj amen koe, me kin kadeikada, me kin wiewia mepukat, ap wiada dueta, koe kiki *on*, me koe pan piti *jan* kadeik en Kot? 4 De koe mamaleki kalanan en Kot japan, o a kanonama o papadake; koe jota aja, me kalanan en Kot kamaterok uk alan kalula? 5 A koe ni monion om me katiwo o kakaluak, me koe ki penan uk *onion on* ni ran en *onion* o kajanjal pan kadeik pun en Kot, 6 Me pan kotin depuk *on* amen amen duen a wiawia kan. 7 Irail me kin dadaurata ni ar wiawia mau kan o *linan*, o indand, o me jo kin mor pajan, maur joutuk. 8 A kamekam o wairok

on irail me katiwo o jo oke melez, a me kin oke japun. ⁹ O kanaudok o kalokolok on aramaj karoj, me wiadar jued, maj on Juj akan ap lel on men Krik. ¹⁰ A linan, o wau, o popol on amen amen, me kin wia mau, maj on Juj akan o pil on men Krik. ¹¹ Pwe Kot jota kin lipilipil aramaj amen. ¹² Pwe karoj me wiada dip likin kapun, pan lokidokila likin kapun, pil karoj, me aja kapun, ap wiada dip, pan pakadeikada pan kapun. ¹³ Pwe kaidin me roneron kapun kan pan pun kila mon Kot, a me kin anada kapun pan pun kila. ¹⁴ Pwe ma men liki, me jota arail kapun, ap pil wiawia tiak en kapun jan nan pein irail, iei me irail, me jota arail kapun pein kapun parail. ¹⁵ Me kin kajanjaleda wiawia en kapun me intinidier nan monion arail, i me injen arail pil kadedeki o ar lamalam, me irail jakara kida de kalole mau ki nan pun arail. ¹⁶ Lao ran o, me Kot pan kotiki on Iejuj en kadeikada dip okiok kan ren aramaj akan, duen ai ronamau. ¹⁷ A ma koe adaneki Juj amen, me kin liki kapun o juaiki Kot, ¹⁸ O ajada kupur a, o koe pun kila lamalam, ni om padapadaki jan nan kapun, ¹⁹ Koe me lameda, me koe itar on, en kalua wei me majkun akan, o kamarain pan me rotorot akan, ²⁰ O jaunkaian pan me lampon kan, o jaunpadak en kijin jeri kan, me aja tiak en lolekon o melez en kapun. ²¹ Ari, koe kin kawewe on amen, ap jota kin kawewe on pein uk, o koe kin padaki me ren der pirap, a koe kin pirap; ²² Koe kin inda, me aramaj ender kamal, a koe kin kamal? Koe kin juedeki dikedik en ani mal akan, a koe kin pirap me japwilim en Kot? ²³ Koe kin juaiki kapun,

a koe kin kijan Kot wau ni om tiakedi kapun? ²⁴ Pwe mar en Kot kin mamale kila komail ren men liki kan, duen a intinidier. ²⁵ Pwe jirkomjaij me mau, ma koe aneda kapun; a ma koe tiakedi kapun, om jirkomjaij pan jojirkomjaij. ²⁶ Nan i, me jojirkomjaij, anada pun en kapun, daduen a jojirkomjaij jo pan wadok on i jirkomjaij? ²⁷ Ari, ma me udan jojirkomjaij akan pan kapwaiada kapun, re jota pan kadeik uk ada? Pwe koe kin mi pan kijin likau o jirkomjaij, ap tiakedi kapun o. ²⁸ Pwe kaidin i Juj amen, ma pali liki ta, o pil kaidin i jirkomjaij, me jirkomjaij liki nan uduk eta. ²⁹ A i Juj amen, me Juj en lole, o i jirkomjaij, me mi nan monion i, ni nen e, a kaidin ni intin; me a kapinepa jota mi ren aramaj akan pwe ren Kot.

3

¹ ARI, da me Juj akan paieki mon me tei kan de da kadepan jirkomjaij? ² O me toto, ni jon karoj; iet kaieu: Majan en Kot akan kanikid on irail. ³ A ma akai jopojon a pil menda? Pwe ar jopojon pan kak kawela kalanan en Kot? ⁴ O jo! Pwe Kot udan melel, a aramaj karoj me likam duen a intinidier: Ir eta me pun ni ar majan akan, o komui pan kotin poedi ni ar pakadeikada. ⁵ A ma atail japun kaidinda pun en Kot, da me kitail en inda? Dadue, Kot me pil japun, pweki a kotin onion kida? I kin lokaia ni tiak en aramaj. ⁶ O jo! Pwe ma iduen, Kot pan kak kadeikada jappa? ⁷ Pwe ma melel en Kot pwai kida ai likam kan, pwen kalinanada i, menda i pan pakadeikada, dene dipan amen nai? ⁸ A jo mau on duen at indand jued, pwe akai kin inda, me dene kit kin

padaki wei: Kitail en wiada me jued, pwen kareda me mau? Nan arail kalokolok me pun. ⁹ Iaduen atail pai mau jan arail? Kaidin, pwe je kadededar, me Juj o men Krik karoj mi pan dip, ¹⁰ Duen a intinidier: Jota me pun amen, jota amen. ¹¹ Jota me lolekon amen, jota me kin rapaki Kot. ¹² Karoj me japunlar, irail wiaki eu mamalar, jota meamen, me kin wiada me mau, jota amen. ¹³ Tapin wor arail me rajon joujou eu, me jaikenta jarep pena, lo arail me re liliapaki, wini en kamela mimi ni oton ni arail; ¹⁴ Au ar me dir en lalau e katik, ¹⁵ Nä arail me marara on kamela aramaj; ¹⁶ Nan al arail me dir en jued o mauk; ¹⁷ A al en popol me re jaja; ¹⁸ Re jota kin majak Kot. ¹⁹ A kitail ajaer, me kapun o lolok on, me kin papa kapun pwe au karoj en japaimokid o jappa pon lodi on kadeik en Kot. ²⁰ Ari mon Kot jota uduk me pan pun kila a wiawia kapun, pwe kapun me dip kadiarok kidar; ²¹ A anjau wet pun en Kot janjaledar likin kapun o kadede kidar kapun o jaukop akan. ²² A pun en Kot me pwili jan pojon Iejuj Krijtuj, ap lel on karoj me pojon. ²³ Pwe jota lipilipil, karoj me wiadar dip o jota kak konodi linan en Kot. ²⁴ Irail pan pun kila a mak japan, pweki en Krijtuj Iejuj a kotin dore kitail lar, ²⁵ Me Kot kotin kajanjaledar en wiala mol en kalanan ni pojon nt'a, pwen kajanjaleda a pun ni a kotin lapwada dip en maj akan, me mier pan papadake en Kot. ²⁶ A anjau wet a kotin kadededa a pun. Ieteten, me pein i me pun, ap pan kotin kapunala karoj me pojon Iejuj. ²⁷ Ari, ia men juaiki? A lokidokilar! Ren kapun da? En wiawia kan? Kaidin, a ren kapun en pojon. ²⁸ Ari,

iet me je inda: Aramaj en pun kila pojon a kaidin wiawia en kapun kan. ²⁹ De Kot en men Juj akan arail Kot eta? Kaidin pil Kot en men liki kan? Ei melel, pil en men liki! ³⁰ Ari, Kot me ta men, me kin kapun kila me jirkomjaij akan pweki pojon, pil jojirkomjaij akan pweki pojon. ³¹ Iaduen, kitail kin tiakedi kapun pweki pojon? O jo! Pwe kitail kin kapwaiada kapun o.

4

¹ ARI, da me kitail en inda duen Apraam jam atail ni pali uduk, da me a diaradar? ² Pwe ma Apraam pun kilar a wiawia kan, nan a men juaiki mia, a kaidin mon Kot. ³ Pwe da me kijin likau majanier? Apraam pojon Kot, o i me wadok *on* i kapuna pa. ⁴ A me kin keleki a wiawia kan, nan pwain a pan wad *on* i nin tiak en kujoned a kaidin ni mak. ⁵ A me jota kin keleki a wiawia kan, ap pojon i, me kin kapunala me doo jan Kot akan, nan a pojon me wadok *on* i kapuna pa i. ⁶ Duen Dawid kapaiaki aramaj amen, me Kot kotin kapunala likin a wiawia kan: ⁷ Meid pai, me ar japun kan lapwadar, o me dip ar akan pwaipwaidier! ⁸ Meid pai ol o, me Kaun o jolar pan kapokoki *on* dip a! ⁹ Ari, me jirkomjaij eta, me pai wet kin ko *on*, de a pil itar *on* me jojirkomjaij? Pwe kit me indada: En Apraam a pojon me wadok *on* i kapune pa. ¹⁰ Ari, iaduen a wadok *on* i? Ni a jirkomjaijelar de ni a jojirkomjaijelar? Kaidin ni jirkomjaij, pwe ni a jojirkomjaij. ¹¹ A a aleer kilel en jirkomjaij, men kadede a pun kilar pojon, me a anekier ni a jojirkomjaij, pwen wiala jam en me pojon ap jojirkomjaij akan karoj, pwe pun wet en pil wadok

on irail. ¹² O pil wiala jam en me jirkomjaij akan. A kaidin arail me jirkomjaij akan eta, pwe pil en irail, me aluki pojon ota, me mi ren jam atail Apraam ni a jojirkomjaij. ¹³ Pwe kaidin ki kapun o me Apraam o kadaudok a aleer inau o, me a pan jojoki jappa, a ki pojon pun. ¹⁴ Pwe ma irail, me men kapwaiada kapun o, pan ale jojo, nan pojon me mal kot, o inau olar. ¹⁵ Pwe kapun o kin kareda *onion*, pwe ma jota kapun, a pil jota japun. ¹⁶ I me pun pan tapi *jan* ni pojon, pwe karoj en tapi *jan* mak; o inau *on* kadaudok o en *teneten*. A kaidin ir eta, me mi pan kapun o, pwe pil karoj, me mi pan pojon en Apraam, me jam en kitail karoj. ¹⁷ Duen a intinidier: I wia kin uk alar jam en wein jappa toto mon Kot, me a pojon me kin kamaureda me melar akan o molipei ir, me jaikenta mia, pwen miala. ¹⁸ I me pojon, ap jota kaporopor mia, pwen wiala jam en wein jappa toto, duen a lokido: Nan iduen kadaudok om. ¹⁹ Ap jota luetalar ni a pojon o jo lamelame, me war a melar, pwe a koren ion jaunpar epuki; pil jota lamelame war en Jara a melar. ²⁰ Pwe a jota peikajaleki inau en Kot ki jopojon, a a kakairida ni pojon, o i me a kin kapinaki Kot. ²¹ A aja melelia, me i kotin inauki *on* i, a pan kotin kapwaiada. ²² Nan i wadok *on* i kapuna pa. ²³ Mepukat jota intinidier pweki i eta, me a wadok *on* i mepukat, ²⁴ A pil pweki kitail, me a pan wadok *on*, ma kitail pan pojon i, me kotin kaiajadar Iejuj atail Kaun *jan* ren me melar akan. ²⁵ Pwe i me panalar pweki dip atail, o a kotin iaajadar pwen kapun patail.

5

¹ KITAIL ari pun kilar pojon, ap popol ren Kot, pweki atail Kaun Iejuj Krijtuj, ² Me kotin kajamo kitail ki pojon *on* mak wet, me kitail aleer, ap kaporopor o juaiki linan en Kot, ³ A kaidin i eta, pwe kitail pil juaiki at apwal akan, pwe kitail aja, me at apwal akan kin kareda kanonama; ⁴ A kanonama kin kareda kakairida, a kakairida kin kareda kaporopor; ⁵ A kaporopor jota kin kanamenokala, pwe limpok en Kot me wudokidi *on* nan monion atail ki Nen jarau, me kitail aleer. ⁶ Pwe ni atail luet Krijtuj mata kin kitail, me doo *jan* Kot akan ni anjau me kiledier. ⁷ Pwe iaduen, amen pan mekila me pun amen? Ele pweki me mau amen, me amen pan mekila. ⁸ A Kot kotin kajanjaleda a limpok *on* kitail ni en Krijtuj a mata kin kitail lar, ni anjaun atail dipan. ⁹ Melel kausalap, anjau wet kitail kapun kilar nta; kitail ap kamaur kila i *jan* ni *onion*. ¹⁰ A ma kitail kalolamaui *on* Kot ki en japwilim a Ol a matala ni atail imwintiti, nan melel kausalap murin atail kalolamaui kitail pan dorela ki a ieiaj, ¹¹ A kaidin i eta, pwe kitail pil juaiki Kot ren atail Kaun Iejuj Krijtuj, me kitail paieki tom patail. ¹² Ari, duen aramaj ta men, me dip tapiki *don* jappa, ap tialan mela, o mela lel penan aramaj akan karoj, pwe karoj me wiadar dip, ¹³ Pwe dip mi nan jappa mon kapun, a jota kapun pan dip, ma jota kapun, ¹⁴ Ari jo, mela wiuiada *jan* Adam lel Mojej, pil ren me jo wiadar dip laud dueta *japun* en Adam, iei me mom en me pan pwarado. ¹⁵ A pai en mak kaidin dueta dip, pwe ma dip en me ta men me toto mekila, nan melel kausalap mak en Kot o pai en mak *jan* ren

aramaj ta men Iejuj Krijtuj itar *on* me toto. ¹⁶ A pai o kaidin dueta met, me wiauier ren amen, me wiadar dip, pwe kadeik o tapi *janer* me ta men, pwen kalokolok, a pai en mak o kin lapwada dip toto, pwen punala. ¹⁷ Pwe ma dip en me ta men mela poekidier, nan mel el kausalap, irail me pan ale mak o pai en pun, pan poedi o mamaureki me ta men: Iejuj Krijtuj. ¹⁸ A duen dip en me ta men aramaj akan karoj me kadeik ki *on* mela, i dueta pun ta ieu itar *on* kapun kila aramaj akan karoj, en kamaurela. ¹⁹ Pwe duen jopeik en aramaj ta men me toto wia kilar dipan, iduen peik en me ta men me toto pun kilar. ²⁰ A kapun pil wiauier, pwe dip en kadiarok kidar, a waja me dip paraparada ia, iei waja mak o laude *janer*. ²¹ Pwe duen dip dialan mela, iduen mak o pun pan dialan maur joutuk ki Iejuj Krijtuj atail Kaun.

6

¹ ARI, da me kitail en inda? Kitail en dadaurata dip, pwe mak en lalaudala? ² O jo! Pala kitail pan dadaurata dip, me kitail mela *janer*? ³ De komail jota aja, me karoj, me paptaije *on* Krijtuj Iejuj, paptaije *on* a matala? ⁴ Kitail ari *ian* i Jaredier ni paptaij *on* mela, pwe duen Krijtuj kaiaja kidar linan en Jam *jan* ren me melar akan, iduen kitail en pil weweideki ni maur kap. ⁵ Pwe ma kitail kaparoki *on* i ni a matala, nan kitail pil pan paroki *on* i ni a iajadar. ⁶ Pwe kitail ajaer, me atail aramaj marin *ian* kalopuelar, pwe war en dip en mokonaidier, pwe kitail jolar papa dip. ⁷ Pwe me melar, maiodar *jan* dip. ⁸ A ma kitail *ian* Krijtuj matalar, nan kitail kamelele, me kitail pil pan *ian*

i ieiajata. ⁹ Kitail aja, me Krijtuj kotin iajadar *jan* ren me melar akan, ap jolar pan pur *on* matala; mela jolar pan poedi i. ¹⁰ Pwe ni a kotin matalar, a kotin matalar pan metapak pweki dip, a ni a kotin ieiajata, a kotin ieiajadan Kot. ¹¹ Iduen komail, komail en wia kin komail me melar *jan* dip, ap memaur *on* Kot ren Krijtuj Iejuj. ¹² Ari, komail ender mueid *on* dip, en kaunda war omail luet; pwen papa a inon jued akan. ¹³ Komail pil der mueid *on* dip o kokon omail akan, pwen men wia japun a komail mueid *on* Kot pein komail, duen me kamauradar *jan* ren me melar akan, o kokon omail akan en papa me pun *on* Kot. ¹⁴ Pwe dip jota pan kak poe komail edi, pwe komail jolar mi pan kapun, pwe pan mak. ¹⁵ Ari da, kitail en wia dip, pwe kitail jolar mi pan kapun, a pan mak? O jo! ¹⁶ Komail jota aja, ma komail pan wiala pein komail ladu en peik, ari komail pan ladu en me komail kin pepeiki *on*? Ma dip komail pan mekila, a ma peik, komail pan pun kida. ¹⁷ A danke *on* Kot pwe komail jolar ladu en dip; pwe met komail kin peiki *on* tiak en padak me komail ianer *jan* monion omail. ¹⁸ Komail ari maioda *jan* dip, komail id wiala ladun pun. ¹⁹ Nai me inda met nin tiak en aramaj, pweki luet en uduk omail. Pwe duen omail panalan kokon omail akan, en ladun jamin o japun kan, pwen palian kapun, iduen komail en pan *on* kokon omail, en lidui me pun, pwen jarauila. ²⁰ Pwe ni anjau me komail ladun dip, komail maio *jan* me pun. ²¹ A iaduen wan mepukat ni anjau o, me komail kin namenokki anjau wet? Pwe imwi pan mepukat mela. ²² A met

komail maiodar *jan* ni dip, ap id wialar ladun Kot, o omail wan jarau mia o imwi pan maur joutuk. ²³ Pwe pwain en dip mela, a pai en mak en Kot maur joutuk ren Krijtuj Iejuj atail Kaun.

7

¹ DE ri ai kan, komail jota aja — i kin peidok ren me aja kapun o — me kapun o kin poedi aramaj arain a memaur? ² Pwe li amen, me a warok mia, kin kaupinki kapun en a warok arain a memaur. A ma a warok melar, a muei janer kapun en a warok. ³ A ma a pan paudeki amen ol ni a warok memaur, a pan adaneki kamal amen; a ma a warok melar, a muei janer kapun, ap jota pan kamal amen, ma a pan pur *on* amen ol. ⁴ Ari ri ai kan, iduen pil komail mekilar kapun o pweki war en Krijtuj, pwen wiala nain amen, iet, me iajadar *jan* ren me melar akan, pwen kaparapar *on* Kot. ⁵ Pwe ni at kekeideki tiak en pali uduk, inon en dip me kelail nan kokon atail pweki kapun o, pwen kaparapar *on* mela. ⁶ A met kitail muei janer kapun o, pwe jal pat *on* mela olar, pwe kitail en papa *on* tiak kap en nen, a kaidin *on* tiak marin en intin. ⁷ Ari, da me kitail en inda? Me dip kapun o? O jo! A i pan jaja dip, ma jo kapun. Pwe i pan jaja duen inon jued, ma kapun jo kalok kidar: Koe der norok! ⁸ A dip kadiarok kidar kujoned, ap kainon *on* ia jon en inon jued karoj, pwe ma jota kapun dip mela. ⁹ Pwe maj o i jota mi pan kapun, ap mamaureta, a kujoned lao mia, dip ai ap diarokadar. ¹⁰ A nai melar; kujoned, me loki *don* ia, pwe i en maure kida, kare *on* ia mela. ¹¹ Pwe dip kadiarok kidar kujoned liapai ia dar, ap kame ia lar. ¹² Ari, kapun

o me jarau i o kujoned me jarau i, a pun o mau. ¹³ A iaduen me mau kot kare *on* ia mela? O jo! A dip en janjale kida me kamau o ni a kare *on* ia mela, pwe dip en janjale kida kujoned. ¹⁴ Pwe kitail aja, me kapun o me *nenin*, a *nai* me uduken o netilan dip. ¹⁵ Pwe i jota aja, da me i en wia. Pwe kaidin me i mauki, me i kin wiada, a me i kin juedeki, iei me i kin wia. ¹⁶ Ari, ma i kin wiada, me i *kan* wia, nan i kin kajanjaleda, me kapun me mau. ¹⁷ A ma i wiadar, me i jota men wia, kaidin *nai* me wiadar, a dip me mimi lol i. ¹⁸ Pwe i aja, me jota mau kot mi lol i nan uduk ai, pwe i kin men wiada me mau, a en *anada* me pun i jota kak *on*. ¹⁹ Pwe me mau o, me i men wiada, i jota kin kapwaida, a me jued, me i *kan*, i me i kin wiada. ²⁰ A ma i wiada, me i jo men wiada, kaidin *nai* me wiada, a dip me mi lol i. ²¹ Iet me kapun kadiarok *on* ia: Ni ai men wiada me mau, me jued mimi re i. ²² Pwe i kin mauki kapun en Kot pali lol en aramaj. ²³ I ap diadarar eu kapun ni ai kokon akan, me kin palian kapun en loli, ap kalua ia di pan kapun en dip, me mi nan ai kokon akan. ²⁴ O *nai* aramaj luet amen! Ij me pan kamaio wei ia *jan* ni war mela wet! ²⁵ I danke Kot pweki Iejuj Krijtuj atail Kaun. Nan lol i i kin papan kapun en Kot, a ni pali uduk kapun en dip.

8

¹ ARI, jolar me mau *on* pakadeikada, me mi ren Krijtuj Iejuj. ² Pwe kapun en *Nen* en maur ren Krijtuj Iejuj kamaio ia da *jan* ni kapun en dip o mela. ³ Pwe me kapun jota kak *on*, aki a luate kila pali uduk, iei me Kot kotin wiada ni a kotin poronedo japwilim a Ol ni mom en uduk en

dip, pweki dip, pwen kadeikada dip ni pali uduk. ⁴ Pwen kapwaiada pun en kapun re atail, me jota weideki pali uduk a pali Nen. ⁵ Pwe me kijan pali uduk, kin lamelame duen inon en uduk, a me kijan pali Nen, kin lamelame duen inon en Nen. ⁶ Pwe tiak en uduk iei mela, a tiak en Nen maur o popol. ⁷ Pweki tiak en uduk kin palian Kot, pwe a jota kin duki on kapun en Kot, pwe a pil jota kak on. ⁸ A me kijan pali uduk, jota kak konekon ren Kot. ⁹ A komail kaidin kijan pali uduk, pwe kijan pali Nen, ma Nen en Kot kotikot lol omail. A me jota aneki Nen en Krijtuj, i kaidin japwilim a. ¹⁰ A ma Krijtuj kotikot lol omail, war mekilar dip, a nen memaureki pun. ¹¹ A ma Nen o, me kaiajadar lejuj jan ren me melar akan, kotikot lol omail, nan i me kaiajadar Krijtuj jan ren me melar akan, pil pan kamaureda war omail mela ki Nen e, me kotikot lol omail. ¹² Ari ri ai kan, kitail jolar pwaipwand on pali uduk, pwen kapwaiada inon en uduk, ¹³ Pwe ma komail memaureki uduk, komail pan mela, a ma komail pan kamela wiawia en pali war ki Nen, komail pan memaureta. ¹⁴ Pwe karoj me weweideki Nen en Kot, nan irail jeri en Kot akan. ¹⁵ Pwe kaidin nen en ladu, me komail aleer, pwen pur on majak, a Nen en jeri, me komail aleer, me kitail kin eker kida: Apa, Jam! ¹⁶ Pein nen o kotin ian nen atail kadedeki, me kitail jeri en Kot akan. ¹⁷ A ma kitail jeri kan, nan kitail pil jeri en jojo, jeri en jojo en Kot o kijan toun jojo en Krijtuj, ma kitail ian kamekam, kitail pil pan ian linanla. ¹⁸ Pwe i ajaer, me kamekam en anjau et jota mau on en kaparoki on linan kokodo, me pan kajanjaledan kitail, ¹⁹ Pwe audepan jappa

poden anane kaulap papajan en jeri en Kot ar pan maioda. ²⁰ Pwe audepan jappa o panalan mela, kaidin pweki pein injen arail, a pweki i, me pan ir alan kaporopor. ²¹ Pwe audepan o pil pan maioda jan ni a lidulidui on tiak en joredi, on maio en linan en jeri en Kot akan. ²² Pwe kitail ajaer, me audepan jappa karoj kin janejanlol o mimi pan wairok en naitik lao lel met. ²³ A kaidin irail eta, pwe kitail pil ian, me mejenin Nen, pil pein kitail kin janejan, auiaui lao anjau en pali war atail ar kawilikapada. ²⁴ Pwe kitail kamaurelaner kaporopor. A kaporopor me janjal, i kaidin kaporopor; pwe me amen kin ududial, menda en kaporoporeki? ²⁵ A ma kitail kaporoporeki, me kitail jota udial, kitail kin kanonama auiauieta. ²⁶ Pil Nen o kotin jauaja kitail ni atail luet akan, pwe kitail jaja, da me kitail en poeki, o da me kon on, pwe pein Nen o janejanelol o laolao kin kitail. ²⁷ A me kin kotin kajauiada monion akan, mani duen kupur en Nen, pwe a kin kotin laolaoki jaraui kan duen tiak en kupur en Kot. ²⁸ A kitail aja, me karoj kin kamauiala me pok on Kot akan, irail me paeker duen ar kileledier. ²⁹ Pwe me a kotin piladar maj o, iei me a pil kotin kileledier, en tialan mom en japwilim a Ol, pwe a en mejeni nan pun en ri a kan. ³⁰ A me a kotin kileledier maj o, a pil kotin warone irail edo, a me a kotin waronedor, a pil kapun irail alar, a me a kapunalar, a pil kotin kalinan irail adar. ³¹ Ari, da me kitail en jopenki mepukat? Ma Kot ian kitail, ij me pan kak palian kitail? ³² I me jota kotin kajampwaleki japwilim a Ol, pwe a kotiki wei en wiliandi kitail, dadue, a jo

pan kotin japan ianaki don kitail meakaroj? ³³ Ij me pan kapun on en Kot a piladar akan? Pwe Kot eta, me kotin kapunada; ³⁴ Ij me pan kadeikada? Pwe Krijtuj me matalar, me pil kaijada o me pil kaipokedi ni pali maun en Kot, o me pil kin laolao kin kitail. ³⁵ Ij me pan irawei jan kitail ni limpok en Krijtuj? Anjau apwal, de majak, de kamekam, de ijejol, de kilijo, de kamajak, de kodlaj? ³⁶ Duen a intinidier: Pweki komui kit kamekame kilar kaukaule, kit me wadok on jip akan, me kileledier on kamela. ³⁷ A ni mepukat karoj kitail me poedier kaulap pweki i, me pok on kitail er. ³⁸ Pwe i aja, me kaidin mela, de maur, pil kaidin tounlan kan, de jaupeidi, pil kaidin men met, de men mur, de me manaman akan, ³⁹ Pil kaidin men poe, de men pa, de okotme pan kak irawei jan kitail ni limpok en Kot, me mi ren Krijtuj Iejuj atail Kaun.

9

¹ NAI kin lokaia melel ren Krijtuj, o i jota kin likam, pwe injen ai o Nen jarau kadede ia da, ² Me i kin patautau o injenjued nan monion i kaukaule. ³ Pwe pein nai inon ion en riala, pwen dooki wei jan Krijtuj pweki ri ai kan ni pali uduk. ⁴ Iei men Ijrael me udan jeri en Kot, me ar linan, o inau kan, o kapun, o upa Kot, o kokop akan mia, ⁵ Me jamaneki jam atail akan me Krijtuj pil tapi jan ia ni pali uduk a, me poedi meakaroj, iei Kot me iajanai kokolata, amen. ⁶ Pwe kaidin dene majan en Kot jo pwaida, pwe kaidin karoj men Ijrael, me tikidar Ijrael; ⁷ Pil kaidin karoj jeri kan, me kijan kadaudok en Apraam; pwe jan ren Ijaak kadaudok om pan tapi jan ia. ⁸ Ari, kaidin irail

jeri en Kot akan, me jeri kan ni tiak en uduk, a jeri en inau kan pan wad *on* kadaudok o. ⁹ Pwe i majan, majan en inau eu: Ni anjau o I pan kodo, a Jara pan naitikada jeri ol amen. ¹⁰ A kaidin i eta, pwe pil Repeka lao lijean *on* jam atail Ijaak. ¹¹ Pwe ni anjau jeri ko kaikenta ipwidier, o pil kaikenta wiadar meakot mau de me jued, o pwe kupur en Kot en pwaida, kaidin ni wiawia a ni lipilipil ren me piladar o, ¹² A kotin majani *on* i: Me laud o pan papa me tikitik! ¹³ Duen a intinidier: Iakop me I pok *on* er, a Ejau me I likidmalielar. ¹⁴ Ari, da me kitail en inda? Kot me japun? O jo! ¹⁵ Pwe a kotin majani *on* Mojej: I pan maki *on*, me I men maki *on*, o I pan pokepoke, me I men pokepoke. ¹⁶ Ari, jota katepa, ma amen pan pein inon ion de tane wei, a ma Kot pan kotin maki *on* amen. ¹⁷ Pwe kijin likau me katitiki *on* Parao: Nan iet me I kilele uk adar, pwe I en kajale kida uk ai manaman, o pwe mar ai en indandeki jili ni jap akan karoj. ¹⁸ Ari, a kin kotin maki *on*, me a kotin kupura, ap kapitakaila, duen me a kotin mauki. ¹⁹ Koe ap pan indan ia: Ari da me a kailon kin ia? Pwe ij me kak palian kupur a? ²⁰ Ei melel aramaj koe, ij koe, me men palian Kot? Da, dipijou pan indai *on* me wiadar i: Menda koe wiai *on* ia momuei? ²¹ Pala jaun wiada dal jota manaman *on*, en wia kida loPON en pwel ota dal eu me kajelel, de eu me jakanekan? ²² A Kot kotin kanonama *on* dal jued akan, me wiauier *on* lokidokila, ni a men kajaleda a *onion* o manaman, ²³ O a pil men kotin kajaleda a dir en linan ki dal en a mak kan, me a kotin kaonopadar maj o en linanla. ²⁴ Iei

kitail, me a kotin warondo, kaidin *jan* ren Juj akan eta, a pil *jan* ren men liki kan. ²⁵ Duen a pil kotin majanier nan puk en Ojea: I pan kaadaneki irail, me kaidin nai, nai aramaj akan, o me jo kompoke pai, kompoke pai. ²⁶ A pan wiaui waja o me a loki *on* irail: Komail kaidin nai aramaj, i waja re pan adaneki jeri en Kot ieiaj. ²⁷ A Iejaia likelikwir duen men Ijrael: Ma jeri en Ijrael akan pan rajon pik en oror, lua ta pan maurela. ²⁸ Pwe a pan kotin kairela japwilim a dodok o kamode kila ni a pun, pwe Kaun o pan kotin wiada dok motomot nin jappa. ²⁹ O duen Iejaia majanier maj o: Ma Kaun Japaot jo nikideki *on* kitail kaparapar, kitail pan dueta Jodom o Komora. ³⁰ Ari, da me kitail en inda duen men liki kan me jota rapaki pun, re diaradar pun, a pun eu, me tapi *jan* pojon. ³¹ A men Ijrael me inon ion kapwaiada kujoned en pun, ap jota konodi kujoned wet. ³² Pwekida? Pweki a jota tapi *jan* ni pojon a ni wiawia kan, pwe irail dipikelekeleki takai en dipikelekel. ³³ Duen a intinidier: Kilan, I pajonedi takai eu nan Jion, takai en dipikelekel eu o paip en kamakar. A me pan pojon i, a jota pan jarodi.

10

¹ RI ai kan, inon en monion i, o ai nidinid kin irail *on* Kot pan dore ir ala. ² Pwe nai kadede parail, me re kin nantion Kot, ap jaja tiak. ³ Pwe re jaja pun en Kot, ap jojon kapwaiada pein arail pun, ap jota duki *on* pun en Kot. ⁴ Pwe Krijtuj kaimwijok pan kapun o; karoj me pojon en pun kila. ⁵ Pwe Mojej majanier duen pun en me pwili *jan* kapun o: Aramaj o, me kapwaiada jon pukat,

a pan maur kila. ⁶ A iet me pun, me pwili jan pojon, kin inda: Der inda nan monion om: Ij me pan daudala nanlan? Iet wewe: En wadido Krijtuj. ⁷ De ij me pan daudi waja lol? Iet wewe: En wadado Krijtuj jan ren me melar akan. ⁸ A da me a kin inda? Majan o me koren ion uk, a kin mi nan au om o nan monion om;iei majan en pojon, me je kin padaki wei. ⁹ Pwe ma koe pan kadedeki au om Iejuj, me i me Kaun, ap pojon nan monion om, me Kot kotin kaiajadar i jan ren me melar akan, koe ap pan doro kila. ¹⁰ Pwe pojon kin tapi jan nan monion o, pwen pun kila, o kadede kin tapi jan nan au o, pwen maur kila. ¹¹ Pwe kijin likau me majani: Amen amen me pan pojon i, jota pan joredi. ¹² Pwe jota irair eu nan pun en men Juj o men Krik, pwe Kaun en irail karoj me ta men, me dir en kalanan on karoj, me kin likwir on i; ¹³ Pwe amen amen me likwir on mar en Kaun o pan dore kila. ¹⁴ A iaduen, irail pan likwirlan i, me irail jota pojon? A iaduen, irail pan kak pojon i, me re jaikenta ron? A iaduen irail pan kak ron, ma jota jaunpadak? ¹⁵ A iaduen, irail pan kak padaki wei, ma re jota pan pakadarala? Duen a intinidier: Meid pai nä en me padaki ronamau en popol, me padaki ronamau en me mau kan! ¹⁶ A kaidin karoj me peiki on ronamau. Pwe Iejaia majani: Main, ij me kamelele at padak? ¹⁷ Ari, pojon kin pwili jan padak, a padak kin pwili jan majan en Kot. ¹⁸ A nai me inda: Irail jota ronadar? O ei! Pwe nil arail leler jap karoj, o ar padak lel on irair en jappa. ¹⁹ A nai me inda: Ijrael jota wewekier? Pwe iet kaieu, me Mojej majani: I pan kajarowei kin komail, me kaidin nai aramaj, o I pan kamakara kin komail

aramaj pweipwei kan. ²⁰ A Iejaia kelail majani: Nai me kadiarokada *jan* ren me jota rapa kin ia, o Nai me pwara *don*, me jota idok ia. ²¹ A kotin majani duen Ijrael: Kaukaule I kapawei pa i kat *on* aramaj katiwo o *kanudi* kan.

11

¹ ARI, iet me i men inda: Kot kalikalar japwilim a kan? O jo! Pwe *nai* pil kijan men Ijrael, o kadaudok en Apraam, o kainok en Peniamin. ² Kot jota kalikalar japwilim a kan, me a kotin piladar maj o. De komail jota aja, da me kijin likau majanier duen Eliaj ni a kadipa men Ijrael mon Kot majani: ³ Main, irail kamelar japwilim ar jaukop akan, o karonk pajan japwilim ar pei jarau kan, a *nai* ta me lua, a irail pil rapakin ia, pwen kame ia la. ⁴ A da me Kot kotin japenki i? Nai me kanikidi *on* ia ol ijikid me jo kelepuiki *on* Paal. ⁵ Nan iduen anjau wet: Luan me piladar akan mia pweki mak en Kot. ⁶ A ma pweki mak, nan kaidin pweki wiawia kan; pwe ma iduen, mak jolar pan mak. ⁷ Ari, iaduen mepukat? Me men Ijrael raparapaki, re jota diaradar, a me piladar akan diaradar, a me tei kan kapitakailar. ⁸ Duen a intinidier: Kot kotiki *on* irail *nen* en men mair, o por en maj akan, pwe ren der kilan waja, o jalon akan, pwe ren der ron waja lao lel ran wet. ⁹ O Dawid majani: Arail tepel en wiala injar parail, o litip arail, o kapup parail, o karia parail. ¹⁰ Maj arail en rotorotala, pwe ren der kilan waja, o irail en kakoj pena kokolata. ¹¹ Ari, iet me i men inda: Irail dipikelekel pwen pupedi? O jo! A pweki arail pupedi, en id kamaurela men liki kan, pwen kapopot kin irail

do. ¹² Ari, ma arail pupedi id pai *on* jappa, a arail momalar id pai *on* men liki kan, ia wan pai, ma irail karoj pan japaledo! ¹³ Pwe men liki komail, me i men padaki *on*, pwe *nai* wanporon en men liki kan, i men kaindinda ai dodok. ¹⁴ Pwe ma i kak *on*, i pan kainon irail, me kit eu ni pali uduk pwe akai re 'rail en dorela. ¹⁵ Pwe ma arail kalikilar id kalamalam maula jappa, arail kajapaledo jo pan kamaurela *jan* ren me melar akan? ¹⁶ A ma kalap me jarau, plaua amaj pil pan jarau; o ma kalaua me jarau, ra kan pil pan dueta; ¹⁷ A ma ra kai tapenok *jan*, a koe ni om woj mal id peuj *ion*, ap *ian* nim pil en tuka o *ian* maurki kalaua, ¹⁸ Koe ap der juaiki *on* ra kan! A ma koe juaiki *on* irail, kaidin koe me kin wa kalaua, a kalaua kin wa uk. ¹⁹ Koe ap pan indada: Ra kan tapenok wei *jan*, pwe i en id peuj *on*. ²⁰ Me *pun*; jopojon, me re tapenok kilar, a pojon, me koe maur kila, koe der aklapalap a majak! ²¹ Pwe ma Kot kotin muei *jan* udan ra kan, kalaka, pwe ele a pil pan muei *jan* uk! ²² Ari, kilan kalanan o *onion* en Kot; *onion on* irail, me jalonalar, a kalanan *on* uk, ma koe pan dadaurata a kalanan, a ma jo, koe pil pan tapenok *jan*. ²³ A pil irail, ma irail jota pan mimieta ni arail jopojon, re ap pan peuj japal, pwe Kot kotin kak *on* kapure irail do. ²⁴ Pwe ma koe lepuk *jan* ni tuka olip mal, ap peuj japal *on* tuka olip mau, a iaduen udan ra mau kan, re jota pan kak pur *on* udan ar tuka? ²⁵ Ri ai kan, i men, komail en lelapok ki kaponepon wet, pwe komail de aklolekon, duen apali en Ijrael me kapitakailar, lao lel anjaun irail me pilipildar ren men liki kan pwarador. ²⁶ Men Ijrael karoj ap pan maureda, duen a intinidier:

Amen pan kotido *jan* Jion, me pan kawela karoj me doo *jan* Kot akan ren Iakop. ²⁷ Pwe iet ai inau *on* irail, i lao lapwa *jan* irail dip arail akan. ²⁸ Iran ronamau irail me imwintiti pweki komail, a iran lipilipil irail me kompokepa kan pweki jam akan. ²⁹ Pwe Kot jota kin kalukila a pai en mak akan de me a kotin piladar. ³⁰ O duen komail, me pil jota pojon Kot maj o, a met komail aleer mak, pweki arail jopojon. ³¹ Iduen irail me jota pojon mak, me komail diaradar, iei me re pil jota diaradar mak en Kot. ³² Pwe Kot me kotin kapata pena irail karoj ni jopojon, pwen mak pena *on* karoj. ³³ O meid laud erpit en Kot o a kotin mani meakaroj, jota me kak weweki a kadeik kan, de pameda al en a wiawia kan! ³⁴ Pwe ij me ajaer kupur en Kaun o, de ij me padaki *on* i meakot? ³⁵ De ij me ki *on* i meakot, pwen depuk *on* i? ³⁶ Pwe meakaroj tapi *jan* re a, o mia pweki i, o wiai *on* i, linan en ko *on* i kokolata! Amen.

12

¹ RI ai kan, i ap panau komail pweki kalanan en Kot, komail en kida war omail, pwen wiala mairon maur, me jarau o kaperenda kupur en Kot, iei omail kaudok me *pun*. ² Komail der kaalemonin jappa, a komail en kawilikapada lol omail, pwe komail en kak kajauiada, da me kupur en Kot, me mau o kaperen, o unjok. ³ Ki mak, me i aleer, i *indan* amen amen nan *pun* omail, ender *inon ion* pein i, laude *jan* me kon *on*, a en lamelame me a en *pun*, duen Kot kotin nek *on* amen amen wan a pojon. ⁴ Pwe duen ni pali war atail kokon toto mia, a dodok en kokon akan kaidin dupeneta,

⁵ Iduen kitail me toto, war ta ieu ren Krijtuj, kitail ap kokon pena nan pun atail. ⁶ Atail pai en mak akan mia ap toror pajan, duen mak o me kitail aleer: Ma deideikop kitail en kokopada duen wan pojon, ⁷ O ma dodok eu, kitail en kolekol atail dodok; o ma jaunpadak amen, i en wiada padak, ⁸ Ma amen kin panau, i en panau, ma amen kin kijakij wei, a en opampap, ma kaun amen, a en kanekanaion, ma amen, kin kalanan, a en peren kida. ⁹ Omail limpok ender japun, tateki me jued, teneten ni me mau. ¹⁰ Omail limpok pena en tapi jan monion omail; wauneki amen, mon a pan waune kin uk. ¹¹ Der tanana ni omail dodok; nen omail en inon ion dodok on Kaun o. ¹² Peren ni kaporopor; kanonama ni anjau apwal; podidi on kapakap. ¹³ Kijakij on jarau jamama kan; kajamo ki peren. ¹⁴ Kapaiada me kin paki komail; kapaiada o der karia. ¹⁵ Perenda ren me popol akan; o janejan ren me janejan kan. ¹⁶ Komail minimin pena ni omail lamelam, der inon ion meakot me lapalap, a inon ion me tikitik; komail der aklolikon. ¹⁷ Komail der depukki on en amen a me jued me jued, a inon ion me kon on aramaj akan karoj. ¹⁸ Ma a pan kak pa omail, polaul on aramaj akan karoj. ¹⁹ Kompoke pai ko, komail der pein depuk, o komail der madan makar, pwe a intinidier: Ai depuk, Nai me pan depuk, me Kaun o kotin majani. ²⁰ Ari, ma om inwintiti amen men manadar, kamana i; ma a men nim piladar, kanim pileda, pwe ma koe pan wia mepukat, nan koe ap pan ki penan mon a kol moluj. ²¹ Koe der lodi on me jued, a poekidi me jued me mau.

13

¹ AMEN amen en upa kaun akan, me kin poe irail edi, pwe jota kaun akan me jota jan ren Kot, a waja kaun akan mia, nan irail me ren Kot. ² Ari, me pan katiwo *on* kaun akan kin katiwo *on* kujoned en Kot, a me katiwo kan, pan lodi *on* kapun. ³ Pwe jaupeidi kan jota kin kamajakki, me kin wia mau, pwe me kin wia me jued. A ma koe jota men majak kaun akan, en wiada me mau, koe ap pan indandeki pa 'rail. ⁴ Pwe a papan Kot o iei me mau *on* uk, a ma koe wia me jued, majak, pwe a jota kin wa mal kodlaj. Pwe a papan Kot o, pwen kame me wia jued. ⁵ Iei me komail en peiki *on*, a kaidin pweki kamekam a pweki injen omail. ⁶ Iei me komail pil wiai *on* nopwei, pwe irail me papan Kot, me kin kaukaule papa wet. ⁷ Komail ari kapunala omail pwaipwand *on* amen amen! Takjij *on* me takjij kin wiaui *on*, nopwei *on* me nopwei kin wiaui *on*; majak, me majak kin ko *on*; ki *on* wau, me wau kin ko *on*. ⁸ Der pwaipwandeki meakot *on* amen; iet eta: Omail limpok pena, pwe me kin pok *on* amen, kin kapwaiada kapun o. ⁹ Pwe iet akan: Koe der kamal! Koe der kamela aramaj! Koe der pirap! Koe der norok! O ma pil eu kujoned mia, iet orlepa: Koe en pok *on* men imp om due pein uk! ¹⁰ Limpok jota kin wia jued *on* men imp a. Ari, limpok audepan kapun. ¹¹ O pil met: Kitail en dedeki duen anjau o, pwe auer leler, me kitail en pirida jan mair, pwe anjaun atail dorela me koren jan ni tapin atail pojon. ¹² Ponpon daulier, a ran me korendor. Kitail en pwilikidi wiawian rotorot akan, ap ale tatan marain. ¹³ Kitail en kekeid

ni tiak mau, pwe ni ran; der kaped en mana de kamom joko, der jamin de jaut, de luak, de peirin. ¹⁴ A komail ale Kaun Iejuj Krijtuj, o der kanonala pali uduk, pwen aneda a inon jued.

14

¹ KOMAIL apwali me luet ni pojon o der kapin irail ada. ² Amen kin lamelame, en kankan jon karoj, a me luet kin kankan wan tuka. ³ Meamen me kin kankan, ender mamaleki, me jota kin kan; o me jo kin kankan, ender kadeikada me kin kan, pwe Kot kin apapwali i. ⁴ Pwe ij koe, me kin kadeikada en amen a ladu, pwe ma a pan uda de pupedi a pan nain a jaumaj eta. Melel, a pan pil uda, pwe Kaun o me kotin kak on kauada i. ⁵ Amen kin pilada a ran kajampwal mon me tei kan, a amen ran karoj dupeneta re a; a amen amen en pun ni a lamelame. ⁶ Meamen me moaki ran eu, Kaun o me a moaki on, me kin mana, Kaun o me a mana on, pwe a kin danke Kot, o me jota mana, nan Kaun o me a jo mana on, ap kin danke Kot. ⁷ Pwe jota meamen re 'tail kin memaur ion pein i, o jota me kin mela on pein i. ⁸ Pwe ma kitail memaur, Kaun o me kitail kin memaur ion, o kitail mela, Kaun o me kitail pan mela on, ari, kitail memaur de mela, japwilim en Kaun o kitail. ⁹ Pwe i me Krijtuj matalar ap iajadar, pwen kaunda me melar o memaur akan. ¹⁰ Ari, menda koe kin kadeikada ri om? De koe, menda koe mamaleki ri om? Pwe kitail karoj pan wijikelan mol en kadeik en Kot; ¹¹ Pwe a intinidier: Kaun o kaukila pein i majani: Nä karoj pan kelepuki on ia, o lo karoj kadede Kot. ¹² Nan i kitail karoj pan weokada

pein kitail *on* Kot. ¹³ Kitail ari ender kadeikada amen amen; a mak eta, kitail en kadeikada iet akan, ender ki *on* ri atail kajajepa de men kamakar. ¹⁴ Nai me lamedar o ajadar pan Kaun Iejuj, me jota okotme me udan jamin; a meamen, me kajamineki meakot, nan i me jamin *on*. ¹⁵ Pwe ma ri om pan injenjuedeki om kijin mana, koe jota kin weweid nin tiak en limpok; ender kawe kila om mana i, me Krijtuj mata kilar. ¹⁶ Komail ari kalaka, pwe omail wiawia mau de kalok jued: ¹⁷ Pwe wein Kot kaidin mana o nim, a pun, o popol, o peren ren *Nen* jarau. ¹⁸ Pwe me kin papa Krijtuj ni mepukat, i me pun ren Kot o pil konekon ren aramaj akan. ¹⁹ Kitail ari en inon ion meakan, me kin kareda popol o kamakamaui kitail pena amen amen. ²⁰ Koe ender kawe kila kijin mana wiawia en Kot. Ari, karoj me min, ap jued *on* aramaj amen, me luet ap manamana. ²¹ Me mau, koe ender kan uduk de nim wain, de wia meakot, me ri om ol pan pupe kidi, de makaraki, de kaluete kila. ²² A ma om pojon mia ni mepukat, ari kamaui pein uk mon Kot. Meid pai, me jota kin kadeikada pein i ki meakan, me a kin kajampwaleki. ²³ A meamen, me peikajal ap mana, me pakadeikadar, pwe a jota tapi jan pojon. A karoj me jota kin tapi jan pojon, iei dip.

15

¹ A MAK eta, kitail kelail akan, en jauaja me luet akan, ap der peren ki pein kitail. ² Amen amen kitail en pok *on* men impa, pwen kamauiala i. ³ Pwe Krijtuj pil jota kin pok *on* pein i, a duen intinidier: Pakainak en me kainaki komui, me

I dikidier raudi. ⁴ Pwe karoj me intinidier maj o, me intinidier, pwen padaki don kitail, pweki kanonama o kamait en kijin likau kan kitail en kaporopor. ⁵ Ari, Kot en kanonama o kamait en kaminimin komail pena duen Krijtuj Iejuj. ⁶ Pwe komail en kalinanada Kot o Jam en atail Kaun Iejuj Krijtuj ni lamalam ta pot o au ta ieu. ⁷ I me komail en apapwali pena dueta Krijtuj me kotin kajamo komail *on* linan en Kot. ⁸ Pwe *nai* inda, me Iejuj Krijtuj wialar papan jirkomjaij pweki melel en Kot, pwen kapwaiada inau kan *on* jam akan. ⁹ Pwe men liki kan en kalinanada Kot pweki a mak duen a intinidier: I me I pan kadededa komui ren men liki kan o kauleki mar omui. ¹⁰ O pil eu me a kotin majani: En popol komail men liki kan ianaki japwilim a aramaj! ¹¹ O pil eu: Kapina Kaun o, komail men liki kan karoj o kalinanada i, komail wei karoj! ¹² O pil eu me Iejaia majani: Ip en Ieje pan pwarado, a pan pwarado, pwen kaunda men liki kan, i me men liki kan pan kaporoporeki. ¹³ Ari, Kot en kaporopor en kadire kin komail peren o popol karoj ni pojon, pwe omail kaporopor en laudeki manaman en Nen jarai. ¹⁴ A *nai* aja mau duen komail ri ai kan, me komail dir en kamau o audaudeki erpit, o koiokki *on* panapanau pena amen amen. ¹⁵ Ari jo, ri ai kan, i intin won komail er duen met, pwen kataman kin komail mak eu, me Kot kotiki *on* ia er. ¹⁶ Pwe i en papan Krijtuj Iejuj *on* men liki kan, padapadaki won ir ronamau en Kot, pwe men liki en wiala mairon eu, me konekon, me kajarai kila Nen jarai. ¹⁷ I me i kak juaiki pan Krijtuj Iejuj pweki meakan me japwilim en Kot.

18 Pwe i jota pori *on* inda meakot, me Krijtuj jota kotiki *on* ia, i en kalua men liki *on* peik, ki ai padak o wiawia kan. 19 O kilel o manaman akan, en *Nen* jarau. Ari, i me i kadire kila *ronamau* en Krijtuj jap karoj, tapiada Ierujalem, ap lel *on* Ilirien. 20 Nai nantion ni ai padaki *ronamau* waja me jaikenta aja duen Krijtuj pwe i de kauada pon pajon en amen. 21 A duen a intinidier: Me jaik kalok *on* irail pan kilan, o me jota *ron*, re pan weweki. 22 Nan i me karompwa ia pan pak toto, pwen jota kak pwar won komail. 23 A met jolar wajan dodok ni jap pukat, a par toto me i inon *ion* en paj won komail. 24 I lao jailokelan Jpanien, i pan pwar won komail, pwe i kaporoporeki, me i pan jup waja o ap kilan komail, a komail pan kalua ia lan waja o murin ai kajerloleit re omail. 25 A met i pan jailokelan Ierujalem, pwen papa jarau kan. 26 Pwe men Majetonien o Akaia kan mauki kijakija wei *on* jarau jamama kan, me mi Ierujalem. 27 Irail mauki pwe re pil pwaipwand *on* irail, pwe ma men liki kan pwaijanekier arail pai nenin, nan me kon *on*, irail en pakijakij don irail ar pai pali war. 28 I lao kapwaiadar mepukat o ki *on* irail er kijakij japan wet, i ap pan jup re omail o daululan Jpanien. 29 A i ajadar, i lao pwaralan komail, i pan dir pai ki en Krijtuj. 30 A ri ai kan, i ap poeki komail pan atail Kaun Iejuj Krijtuj o limpok en *Nen* pwe komail en dauki pena *on* ia omail kapakap kin ia *on* Kot. 31 Pwe i en piti jan men Iudäa jopojon akan, o pwe ai dodok *on* Ierujalem en jauaja jarau kan. 32 Pwe i en perenki lel *on* komail pan kupur en Kot o *ian* komail tapwenda.

33 Ari, Kot en popol en kotikot re omail karoj!
Amen.

16

¹ I ap kakaliki *on* komail ri atail li Pepe, me kin papan momodijou en Kenkrea, ² Pwe komail en kajamo i pan Kaun duen me kon *on* jarau kan, o komail jauaja i ni meakaroj, pwe i me jauaj pan me toto o pil nai. ³ Ai ranamau *on* Prijila o Akwila, me jauaj pai ren Krijtuj Iejuj. ⁴ Me inepai ia da, me kaidin *nai* eta, me kin danke ira pwe pil momodijou akan karoj nan pun en men liki kan. ⁵ Pil momodijou nan im ara. Ranamau *on* kompoke pai Epenetuj me tapiada momodijou en Krijtuj nan Ajien. ⁶ Ranamau *on* Maria, me kadek papa kit. ⁷ Ranamau *on* Andronikuj o Iuniaj, kompoke pai kan o me *ian* ia jalidi, me majamaj ren wanporon akan, me jau *on* Krijtuj mo i. ⁸ Ranamau *on* Apliaj, me kompoke pai ren Kaun o. ⁹ Ranamau *on* Urpan, jauaja pat ren Krijtuj, o Jtakij kompoke pai. ¹⁰ Ranamau *on* Apelej, me dadaurata ren Krijtuj, ranamau *on* toun im en Arijtopuluj. ¹¹ Ranamau *on* Erodion kompoke pai. Ranamau *on* toun im en Narjijuj, me papa Kaun o. ¹² Ranamau *on* Tripäna o Tripoja, me papa Kaun o. Ranamau *on* kompoke pai Perjij, me porijok ni a dodok *on* Kaun o. ¹³ Ranamau *on* Ruj, me pilipildar ren Kaun o o in a pil in ai. ¹⁴ Ranamau *on* Ajinkrituj, Plekon, Ermaj, Patropaj, Ermej o ri atail akan, me mi re 'rail. ¹⁵ Ranamau *on* Pilolokuj, o Iulia, o Nereuj, ri ai li, o Olimpaj, o jarau kan karoj, mi re 'rail. ¹⁶ Komail ranamauki pena metik jarau. Momodijou en Krijtuj akan

kin ranamau *on* komail. ¹⁷ Ari, ri ai kan, i panau komail, komail en kileledi, me kin kamueit pajan o kamakar momodijou palian padak o me komail aleer; komail ari muei *jan* irail. ¹⁸ Pwe jon pukat jota kin papa atail Kaun Iejuj Krijtuj, a pein kaped arail o kotaueki ar kadek lokaia o widin monion en me lelapok kan. ¹⁹ Pwe omail peik me indand jili lel penan aramaj karoj. I me i peren kida komail. A i men, komail en koiokki *on* me mau kan, ap jokoiokki *on* me jued akan. ²⁰ A Kot popol pan kajuk pajan Jatan pan nä omail eden. Mak en atail Kaun Iejuj Krijtuj en mimieta re omail! ²¹ Timoteuj ai warok en dodok, o kompoke pai ko Lujuj, o Iajon, o Jojipater kin ranamau *on* komail. ²² Iet *nai* Tertiu me intiniedier kijin likau wet, ranamau *on* komail pan Kaun o. ²³ Kaiuj me kin apapwali ia o momodijou, a ranamau *on* komail. Erajtuj, jile pan kanim wet, a ranamau *on* komail, o ri atail Kwartuj. ²⁴ Mak en atail Kaun Iejuj Krijtuj en mimieta re omail karoj! Amen. ²⁵ A me manaman *on* katinada komail duen ai ranamau, o duen padak iran Iejuj Krijtuj, me kin kajaleda, me jota janjal *jan* nin tapin kua kokodo lel met, ²⁶ A met a janjaledar, pwe kijin likau en jaukop akan kaloki *on* men liki kan karoj duen kujoned en Kot ieiaj, pwe ren pojon o peik; ²⁷ I Kot eta me erpit, *linan* en ko *on* i ki Iejuj Krijtuj kokolata! Amen.

Kadede Kap Pjam Akan
The New Testament and Psalms in the Pohnpeian
language of the Federated States of Micronesia (old
translation, using old alphabet)

Public Domain

Language: Pohnpeian

2014-11-10

PDF generated using Haiola and XeLaTeX on 11 Nov 2022 from source files
dated 30 Nov 2021

1941731f-581e-5815-a2a4-a976cf53af02